

«Il Grischun dovra er ina vusch verda»

Ils Verds grischuns cun nov profil e nov num

■ **(anr/fa) Suenter la schliaziun da la partida La Verda dal 2003 era vegni fundà dal 2007 la Partida verda grischuna, la quala è stada activa mo dus onns. Uss ha la partida succesa preschentà program e finamiras.** Suenter che *Martin Tucek* s'ha retratg da primavaira 2009 sco president da la Partida verda grischuna na s'han ils Verds grischuns pli fatg udir. La suprastanza da la partida è però tuttina restada activa: «Nus ans avain prendi il temp per discussiunar noss intents e nossas finamiras», ha ditg *Anita Mazzetta*, commembra da la suprastanza da la partida «Verda Grünes Graubünden»

den» gievgia a chaschun d'ina conferenza da pressa a Cuira. Preschents eran era ses collegas *Angelo Andina* da Tschlin e *Hans-Jörg Hahn* da Glion. Il quart commember da la suprastanza, *Rolf Marugg* da Tavau-Wolfgang, aveva stuì sa laschar stgisar.

S'intermetter activamain en la politica grischuna

Il coordinatur da la partida è Angelo Andina: «Per evitar che la partida vegnia associada adina mo cun ina persuna nun avain nus naging president.» El ha manegià ch'il Grischun haja basegn da refurmas politicas. Ch'i saja en temps da glo-

balisaziun necessari dad integrar en il process da decisiuns politicas era las uschenumnadas minoritads, ha'l ditg. Perquai èsi a ses avis indispensabel d'introducir il sistem electoral dal proporz. «En pli dovra il chantun, en vista a la nova politica regiunala federala, regiuns fermas.» Per quel motiv salida Andina era las fusiuns da vischnancas.

Per ina politica che prenda resguard al clima

Verda fa consequentamain ina politica ecologica: «En il center stat la protezzion dal clima», ha punctuà l'experta per dumondas d'ambient e manadra da

gestiun tal WWF Grischun Anita Mazzetta, «e per cuntanscher quella finamira pon las vischnancas far bler.» La cussegliera communal da Cuira ha menziunà sco exempel las leschas d'energia e da construcziun communalas u era las ovras electricas communalas che produceschan energia ecologica. «La politica da nossa e quella da la Partida verd-liberala sco era da la ps grischuna vegn ad esser en divers puncts identica», constatescha Anita Mazzetta. Quai è tenor ella ina gronda schanza: «Sche pliras partidas vegnan a s'engaschar per ina politica che prenda resguard da noss ambient è la probabilitad d'avair success segirmain pli gronda ch'enfin uss.»

Integrar enstagl da stuair chastiar

«Verda vegn er a s'engaschar per segirezza sociala, furmaziun e sanadad», ha ditg il medi Hans-Jörg Hahn, «tar las discussiuns davart la politica da sanadad sto esser la finamira da pussibilitar a tuts abitants in bun provediment medicinic.» Per pudair garantir quai era per la segirtad èsi sco ch'el ha ditg impurtant d'agir a temp, «il meglier èsi, sch'ins fa quai gia cun uffants da la scolina.» Perquai prenda la Verda ch'i stoppia daventar obligarotic dad integrar ils uffants da lingua estra en gruppas da giu communalas. «La repressiun è sco ultima mesira bain legitima, quai mussa però ch'ins nun ha badà a temp ils privels potenzials», ha ditg Hahn. Il commember da la suprastanza e pur Rolf Marugg vegn a s'engaschar surtut per l'agricultura biologica en Grischun. Sia domena vegn ad esser sco che Angelo Andina ha ditg la politica agrara.

Angelo Andina (san.), Anita Mazzetta e Hans-Jörg Hahn preschentan il nov num da la partida.

FOTO F. ANDRY

